

七十二家集

顏光祿集卷之三

宋琅邪顏延之延年著

明閩漳張爨紹和纂

書

又釋何衡陽書

聖慮難原神應不測中散所云中人有竭莫得其端豈其淺斥所可深抽徒以魏文大布見剋異世滕脩蝦鬚取愧當時故於度外之事怯以意裁耳足下已審其虛實方書之不朽獨鑒鑒

精難復疑問聊寫餘懷依荅條釋事緯殃福義
雜胡華雖存簡章自至煩文過此已往余欲無
言

荅曰若如論旨以三畫爲三才則初擬地爻三
議天位然而遯世無悶非厚載之目君子乾乾
非蒼蒼之稱果兩儀罔託亦何取於立人但爻
在中和宜應君德耳釋曰聞之前學淳象始於
三畫兼卦終於六爻三畫立本三才之位六爻
未變羣龍所經是以重卦之後則以出處明之

故遯世乾乾潛藏皆行聖人適時之義兼之道也若以初爻非地三位非天以爲兩儀罔託立人無取未知足下前論三才同體何因而生若猶受之繫說不軼師訓何獨得之複卦喪之單象如義文之外更有三才此自春秋新意吾無識焉且遯世乾乾雖非覆載之名一體之中未失卑高之實豈得以變動之辭廢立本之義又知以爻在中和宜應君德若徒有中和之爻竟無中和之人則爻將何放若中和在德則不得

人皆中和體合之論固未可殊越

荅曰上仁上義便是計體仁義者爲三才尋又云僑札未獲上附伊顏宜其下麗則黃裳之人其猶弗及雖賸之旨高下無准故惑者未悟釋曰所云上仁上義謂兼總仁義之極可以對饗天地者耳非謂少有耻愛便爲三才前釋已具惟復是問肆彼域中惟王是體知三此兩儀非聖不居易者同歸可無重惑案東魯階差僑札理不允備何由上附至位依西方準墨伊顏未

獲法身故當下麗生品來論挾姬議釋故兩解
此意冀以取了反致辭費聖作君師賢爲臣資
接暢神功影響大業行藏可共默語亦同體分
至此何負黃裳議者徒見不得等位元首橫生
誚恨而不知所之極地更非守節之情指斷如
斯何謂無準

荅曰夫陰陽陶氣剛柔賦性圓首方足容貌匪
殊惻隱耻惡悠悠皆是但參體二儀必舉仁義
爲端耳釋曰若謂圓首方足必同耻惻隱之實

容貌匪殊皆可參體二儀蹻跖之徒亦當在三才之數邪若誠不得則不可見橫目之同便與大人同列悠悠之倫品量難齊旣云仁者安仁智者利仁又云力行近仁畏罪強仁若一之正位將真偽相冒莊周云天下之善人寡不善人多其分若此何謂皆是

荅曰知欲限以名器慎其所假遂令惠人潔士比性於毛群庶幾之賢同氣於介族立象之意豈其然乎釋曰名器有限良由資體不備雖欲

假之疑陽謂何含靈爲人毛群所不能同稟氣
成生潔士有不得異象放其靈非象其生一之
而已無乃誣漫

荅曰已均被同衆云云特靈之神旣異於衆得
生之理何嘗暫同生本於理而理異焉同衆之
生名將安附若執此生名必使從衆則混成之
物亦將在例邪釋曰吾前謂同於所方豈得生
之可異足下荅云非謂不然又曰奚取不異之
生必宜爲衆是則去吾爲衆而取吾不異豈有

不異而非衆哉所以復云故當殊其特靈不應
異其得生耳今荅又謂得生之理何嘗暫同生
本於理而理異焉請問得生之理故是陰陽邪
吾不見其異而足下謂未嘗暫同若有異理非
復煦蒸邪則陰陽之表更有受生塗趣三世詎
宜堅立使混成之生與物同氣豈混成之謂若
徒假生名莫見生實則非向言之匹言生非生
卽是有物不物李叟此說或更有其義以無詰
有頗爲未類

答曰謹爲垣坊云云始云皇聖設候物之教謹
順時之經將以反漸息泰今復以方開所泰爲
難未詳此將難鄙議爲譏聖人也釋曰前觀本
論自九穀以下至孔鉤不綱始知高議謂凡有
宰作皆出聖人躬爲尸匠以率先下民也孤鄙
拙意自謂每所施爲動必有因聖人從爲之節
使不遷越此二懷之大斷彼我所不同吾將節
其奢流故有息泰之說足下方明備設未知於
何去甚而中答又云所謂甚者聖人固已去之

不了此意故近復以所泰爲問荅云未詳誰難
或自忌前報

荅曰市庖之外云云夫禋瘞繭栗宗社三牲脔
腳豆俎以供賓客七十之老俟肉而飽豈得惟
陳草石取備上藥而已而憂不立者非謂洪論
難持退嫌此事不可頓去於世耳釋曰神農定
生同人備教旣唱粒食又言上藥旣用犧牢又
稱蘋蘩祭膳之道故無定方前舉市庖之外復
有御養者捐奪刳滯以明延性不一非謂

經世之事皆當取備草石然芻豢之功希至百
齡芝木之懿亟聞千歲山是言之七十之老何
必謝恩於肉食但自封一域者捨此無術耳想
不可頓去於世猶是前釋所云不能頓奪所滯
也始獲符同敢不歸美旣知不可頓去或不謂
道盡於此

荅曰天下寧有無形之有云云尋來旨似不嫌
有鬼當謂鬼宜有質得無惑天竺之書說鬼別
爲生類邪昔人以鬼神爲教乃列于典經布在

方策卿僑吳札亦以爲然是以雲和六變實降天神龍門九成人鬼咸格足下雅秉周禮近忽此義方詰無形之有爲支離之辯乎釋曰非惟不嫌有鬼乃謂有必有形足下不無是同處有復異是以比及質詰欲以求盡請捨天竺之說謹依中土之經又置別爲生類共議登遐精靈體狀有無固然宜報定典策之中鬼神累萬所不了者非其名號比獲三論每來益衆萬鬼畢至竟未片荅雖啓告周博非解企渴無形之有

既不匠立徒謂交離以爲通說若以覈正爲交離者將以浮漫爲直達乎

荅曰後身著戒云云未詳所謂慈護者誰氏之子若據外書報應之說皆吾所謂權教者耳凡講求至理曾不祈之聖言多採謫怪以相扶翼得無似以水濟水乎釋曰慈護之主計亦久聞其人責以誰子將以文殊釋氏知謂報應之說皆是權教權道隱深非聖不盡雖子通識慮亦未見其極吾疲於推求而足下逸於獨了良有

惡然若權教所言皆爲欺妄則自然之中無復
報應吾懦於擊決足下烈於專斷亦又懼焉神
高聽卑庸可誣哉想云聖言者必姬孔之誥今
之所談皆其信順之事而謂曾不析之復是未
經詳思來論立姬廢釋故吾引釋符姬荅不越
問未覺多採由金口碑不生華壤何限九服之
外不有窮理之人內外爲判誠亦難乎若自信
其度獨思耳目習識之表皆爲譎怪則吾亦已
矣

荅曰又云物無妄然必以類感云云斯言果然則類感之物輕重必侔影表之勢脩短有度致飾土木不發慈愍之心順時蒐狩未根慘虐之性天宮華樂焉賞而上升地獄幽苦奚罰而淪陷唱言窮軒輊立法無衡石一至於此釋曰影表之說以徵感報來意疑不必侔嫌其無度卽復除福應也福應非他氣數所生若滅福應卽無氣數矣足下功存步驗而還伐所知想信道爲心者必不至此若謂不慈於土木之飾有甚

於順時之殺者無乃大負夫人之心黃屋玉璽
非必堯舜之情崇居麗養豈是釋迦之意責天
宮之賞求地獄之罰頗類昔人亞夫之詰英布
之問有味乎其言此蓋衆息心之所詳吾可得
而略之

荅曰且阿保傳愛慎及溷腴良庖提刀情怵介
族彼聖人者明並日月化關三統若令報應必
符亦何妨於教而緘局義唐之紀埋閉周孔之
世肇結網罟興累億之罪仍制牲牢開長夜之

罰遺彼天厨甘此芻豢曾無拯溺之仁橫成納
隍之酷其爲不然宜簡淵慮若謂窮神之智猶
有不盡雖高情愛奇想亦未至於侮聖釋曰知
謂報應之義緘義周之世以此推求爲不符之
證義唐邈矣人莫之詳尙書所載不過數篇方
言德刑之美遑記禍福之源今帝典王策猶不
書性命之事而微闕文以爲古必無之斯亦師
心之過也且信順殃慶咸列姬孔之籍謂之埋
閉如小逕弁但言有遠近教有淺深故使智者

與此而奪彼邪夫生必有欲欲必有求欲歛則
爭求給則恬爭則相害恬則相安網罟之設將
蠲害以取安乎且畋漁牲牢其事不異是下前
荅已知牲牢不可頓去於今世復謂畋漁不可
獨棄於古未爲通類矣好生惡死每下愈篤故
宥其死者順其情奪其生者逆其性至人尙矣
何爲犯順而居逆哉是知不能頓奪所滯故因
爲之制耳聖靈雖茂無以叡懷惛之心弱喪之
民何可勝論罪罰之來將物自取之事遠難致

不由天厨見遺物近易耽故常芻豢是甘極溺
出墮衆哲所共但化物不同非道之異不盡之
讓亦如過當子長愛奇本不類此

荅曰足下論仁義則云情之者少利之者多言
施惠則許其遺賢忘報在情既少孰能遺賢利
之者多曷云忘報若能推樂施之士以期欲仁
之疇演忘報之意引向義之心則義寔在斯求
仁不遠釋曰情仁義者寡利仁義者衆聞之莊
書非直孤說未獲詳校遽見彈責夫在情既少

利之者多不能遺賢曷云忘報實吾前後勤勤以爲不得配擬二儀者耳復非篤論所應據正若樂施忘報卽爲體仁忘報而施便爲合義可去欲字并除向名在斯不遠誰不是慕

荅曰濟有生之類云云斯旨宏誕非本論所及無乃秦師將遁行人言肆乎釋曰足下論挾姬釋吾亦荅兼戎周足下以此抑彼謂福及高門吾伸彼釋此云慶周兆之物足下據此所見謂祚止公侯吾信彼所聞云尊冠百神本議是爭

曷云不及夫論難之本以易奪爲體失之已外
輒云宏誕求理之塗幾乎塞矣師遁言肆或不
在此

答曰豈其相迫居吾語子聖人在上不與百神
爭長有始有卒焉得無死之地云云釋曰豈其
相迫一何務德居吾語子又何壯辭凡爲物之
長豈爭之所得非惟不爭必將下之不可見尊
冠百神便謂與百神爭長無乃取之滕薛棄之
體仁知謂物有始卒無不死之地求之域內實

如來趣前釋所謂勝類諸區有誠亦宜然者也
至如山經所圖仙傳所記事關世載已不可原
况復道絕恒情理隔常照必以於我不然皆當
絕棄此又所不得安

荅曰夫辯章幽明研精庶物云云釋曰逮省此
章盛陳列代文博體周頗善師法歌誦聖世足
爲繁聲討求道義未是要說耳昔在幼壯微涉
羣紀皇王之軌賢智之迹側聞其畧敢辱其詳
惠示之篤實勤執事

荅曰何必陋積慶之延祚希無驗於來生蹲膜
揖讓終不並足竊願吾子捨兼而遵一云云釋
曰不陋積慶已伸信順之條貫希來生之驗亦
具感報之說藻袞大裘同用一體蹲膜揖讓何
爲不俱行一世理有可兼無謂宜捨

荅曰蜀梁二叔甘人譚胥之譬非本論所經故
不復具云釋曰近此數條聊發戲端亦猶越人
問布見採於前談肆業及之無相多怪然二叔
爲問欲以却編戶之疑沒而不荅誠有望焉是

下連國雲從宏論風行吾幽生孤說每獲竊議
此之不侔事有固然實由通才所共者理歟忘
其煩貪復息心

何承天達性論附

夫兩儀既位帝王參之宇中莫尊焉天以陰
陽分地以剛柔用人以仁義立人非天地不
生天地非人不靈三才同體相須而成者也
故能稟氣清和神明特達情綜古今智周萬
物妙思窮幽曠制作侔造化歸仁與能是爲

君長撫養黎元助天宣德日月淑清四靈來
格祥風協律玉燭揚輝九穀芻豢陸產水育
醲醑百品備其膳羞棟宇舟車銷金合土絲
紵玄黃供其器服文以禮度娛以八音庇物
殖生罔不備設夫民用儉則易足易足則力
有餘力有餘則志情泰樂治之心於是生焉
事簡則不擾不擾則神明靈神明靈則謀慮
審濟治之務於是成焉故天地以儉素訓民
乾坤以易簡示人所以訓示慇懃若此之篤

也安得與夫飛沈蠃螬並爲衆生哉若夫衆
生者取之有時用之有道行火俟風暴畋漁
候豺獮所以順天時也大夫不麝卯庶人不
數罟行葦作歌霄魚垂化所以愛人用也庖
厨不邇五犯是翼殷后改祝孔鈞不綱所以
明仁道也至於生必有死形斃神散猶春榮
秋落四時代換奚有於更受形哉詩云愷悌
君子求福不回言弘道之在已也三后在天
言精靈之升遐也若乃內懷嗜欲外憚權教

慮深方生施而望報在昔先師未之或言

與王微書

圖畫非止藝行成當與易象同體而工篆隸者
自以書巧爲高

王微畫序附

辱顏光祿書圖畫非止藝云云欲並辯藻繪
覈其攸同夫言繪畫者竟求容勢而已且古
人之作畫也非以案城域辯方州標鎮阜劃
漫流本乎形者融靈而動變者心也靈亡所
見故所託不動目有所極故所見不周於是

乎以一管之筆擬太虛之體以判軀之狀畫
寸眸之明曲以爲嵩高趣以爲方丈以爰之
畫齊乎太華枉之黠表夫隆準眉額頰輔若
晏笑兮孤巖鬱秀若吐雲兮橫變縱化故動
生焉前矩彼方出焉然後宮觀舟車器以類
聚犬馬禽魚物以狀分此畫之致也望秋雲
神飛揚臨春風思浩蕩雖有金石之樂珪璋
之琛豈能髣髴之哉披圖按碑効異山海綠
林揚風白水激澗鳴呼豈獨運諸指掌亦以

明神降之此謫之情也

弔張茂度書

張敷父喪毀瘠成疾世父茂度每譬止
之輒更哀慟未暮而卒延之書吊茂度
賢弟子少履貞規長懷理要清風素氣得之天
然言面以來便申忘年之好比雖艱隔成阻而
情問無睽薄莫之人冀其方見慰說豈謂中年
奄爲長往聞問悼心有兼恒痛足下門教敦至
兼實家寶一旦喪失何可爲懷

與王曇生書

王弘之卒延之欲爲作誄書
與弘之子曇生諫竟不就

君家高世之節有識歸重豫染毫翰所應載述
況僕託慕末風竊以敘德爲事但恨短筆不足
書美

三月三日曲水詩序

夫方策旣載皇王之迹已殊鐘石畢陳舞詠之情不一雖淵流遂往詳略異聞然其宅天衷立民極莫不崇尙其道神明其位拓世貽統固萬葉而爲量者也有宋函夏帝圖弘遠高祖以聖武定鼎規同造物皇上以敷文承歷景屬宸居隆周之上旣永宗漢之兆在焉正體毓德於少陽王宰宣哲於元輔晷緯昭應山瀆效靈五方雜遝四隩來暨選賢建戚則擇之於茂典施命

發號必酌之於故實大予協樂上庠肆教章程
明密品式周備國容眡令而動軍政象物而具
箴闕記言校文講藝之官采遺於內輜車朱軒
懷荒振遠之使論德於外蘋莖素毳弁柯共穗
之瑞史不絕書棧山航海踰沙軼漠之貢府無
虛月烈燧千城通驛萬里寄居之君內首稟朔
卉服之僭廻面受更是以異人慕響俊民間出
警蹕清夷表裏悅穆將徙縣中宇張樂岱郊增
類帝之壇飭禮神之館塗歌也誦以望屬車之

塵者久矣日躔胃維月軌青陸皇祇發生之始
后王布和之辰思對上靈之心以惠庶氓之願
加以二王于邁出餞戒告有詔掌故爰命司歷
獻洛飲之禮具上巳之儀南除輦道北清禁林
左關巖陞右梁潮源略亭臯跨芝廬苑太液懷
曾山松石峻嵬葱翠陰煙游泳之所攢萃翔驟
之所往還於是離宮設衛別殿周徼旌門洞立
延帷接枅閱水環階引池分席春官聯事蒼靈
奉塗然後升秘駕胤緹騎搖玉鑾發流吹天動

神移淵旋雲被以降于行所禮也旣而帝暉臨
幄百司定列鳳蓋俄軫虹旗委旆看藋芬藉觴
醴泛浮妍歌妙舞之容銜組樹羽之器三奏四
上之調六莖九成之曲競氣繁聲合變爭節龍
文飾轡青翰侍御華裔殷至觀聽奮集揚袂風
山舉袖陰澤靚裝藻野絃服縹川故以殷賑外
國煥衍都會者矣上膺萬壽下禔百福巾筵稟
和闔堂依德情盤景遽歡洽日斜金駕總駟聖
儀載佇悵鈞臺之未臨慨艷宮之不縣方且排

鳳闕以高游開爵國而廣宴竝命在位展詩登
志則夫誦美有章陳信無愧者歟

顏光祿集卷之四

宋琅琊顏延之延年著

明閩漳張燮紹和纂

七

七繹

北岳生剗迹埋名身閑事盡道畜山扃東國進
士謬與遷焉其居也依隱嵒陰結架清深巖屋
橋構磴道相臨寒榮隴首綺飲江潯客曰周以
巖廊匝以綵房木寫雲氣土秘群芳旣旋天而

倒井又斲員而鏤方松丘箭渚藥苑香林梁淵
道以高濟棧巖壘而上尋客曰若夫舟山之奧
金門之秘地首岷銅川上汶泗裁石成音調金
爲噐故列眞玩其微鳴辭人賦其清懿若乃梓
漆簡聲麗容呈才陳舞態開吹臺獵悲風遡秋
埃旣而昵賓獻壽中人奉膳有悄者顏弗怡高
殿視華鼓之繁桴聽邊笳之嘶轉飛朱鷺以首
引逮玄雲而終變然後簪珥搖揮莊服流酒抗
妍歌以跼躡揚輕袖而翳面雜紛披於巾拂遞

間關乎槃扇

庭誥文

庭誥者施於閨庭之內謂不遠也吾年居秋方
慮先草木故遽以未聞誥爾在庭若立履之方
規鑒之明已列通人之規不復續論今所載咸
其素畜本乎生靈而致之心用夫選言務一不
尚煩密而至於備議者蓋以網諸情非古語曰
得鳥者羅之一目而一目之羅無時得鳥矣此
其積意之方道者識之公情者德之私公通可
以使神明加嚮私塞不能令妻子移心是以昔

之善爲士者必捐情反道合公屏私尋尺之身
而以天地爲心數紀之壽常以金石爲量觀夫
古先垂戒長老餘論雖用細制每以不朽見銘
繕築末迹咸以可久承志况樹德立義收族長
家而不思經遠乎曰身行不足遺之後人欲求
子孝必先慈將責弟悌務爲友雖孝不待慈而
慈固植孝悌非期友而友亦立悌夫和之不備
或應以不和猶信不足焉必有不信儻知恩意
相生情理相出可使家有參柴人皆由損夫內

居德本外夷民譽言高一世處之逾嘿器重一時體之茲冲不以所能干衆不以所長議物淵泰入道與天爲人者士之上也若不能遺聲欲人出已知柄在虛求不可校得敬慕謙通畏避矜踞思庸監擇從其遠猷文理精出而言稱未達論問宣茂而不以居身此其亞也若乃聞實之爲貴以辯畫所克見聲之取榮謂爭奪可獲言不出於戶牖自以爲道義久立才未信於僕妾而曰我有以過人於是感苟銳之志馳傾軋

之望豈悟已挂有識之裁入脩家之誠乎記所
云千人所指無病自死者也行近於此者吾不
願聞之矣凡有知能預有文論不練之庶士校
之群言通才所歸前流所與焉得以成名乎若
呻吟於牆室之內喧囂於黨輩之間竊議以迷
寡聞姐語以敵要說是短筭所出而非長見所
上適值尊明臨座稠覽轉論而言不入於高聽
人見棄於衆視則恍若迷塗失偶壓如深夜撤
燭銜聲茹氣腴嘿而歸豈識向之夸慢祇足以

成今之沮喪邪此固少壯之廢爾其戒之夫以
怨誹爲心者未有達無心救得喪多見誚耳此
蓋臧獲之爲豈識量之爲事哉是以德聲令氣
愈上每高然言懟譏每下愈發有尙於君子者
寧可不務勉邪雖曰恒人情不能素盡故當以
遠理勝之么竿除之豈可不務自異而取陷庸
品乎富厚貧薄事之懸也以富厚之身親貧薄
之人非可以一時處然昔有守之無怨安之不
悶者蓋有理存焉夫既有富厚必有貧薄豈其

證然時乃天道若人厚富是理無貧薄然乎必不然也若謂富厚在我則宜貧薄在人可乎又不可矣道在不然義在不可而橫意去就謬生希幸以爲未達至分蠶溫農飽民生之本躬稼難就上以僕役爲資當施其情願庀其衣食定其當治遞其優劇出之休饗後之捶責雖有勸恤之勤而無黷曝之苦務前公稅以遠吏讓無急傍費以息流議量時發歛視歲穰儉省贍以奉已損散以及人此用天之善御生之得也率

下多方見情爲上立長多術聰明爲懿雖及僕
妾情見則事通雖在祿祔明晦則功博若奪其
常然役其煩務使威烈雷霆猶不禁其欲雖棄
其大用窮其細瑕或明灼日月將不勝甚耶故
曰孱焉則差的焉則闇是以禮道尙優法意從
刻優則人自爲厚刻則物相爲薄耕收誠鄙此
用不忒所謂野陋而不以居心也含生之氓同
祖一氣等級相傾遂成差品遂使業習移其天
識世服沒其性靈至夫願欲情嗜宜無間殊或

役人而養給然是非大意不可侮也隅奧有寵
齊侯蔑寒犬馬有秩管燕輕饑若能服濫厚而
知穿弊之苦明周之德朕滋忭而識寡嗟之急
仁恕之功豈與夫比肌膚於草石方手足於飛
走者同其意用哉罰愼其濫惠戒其偏罰濫則
無以爲罰惠偏則不如無惠雖爾眇末猶偏庸
保之上事思反已動類念物則其情得而人心
塞矣并博蒲塞會衆之事諧調哂謔適坐之方
然失敬致侮皆此之由方其尅瞻彌喪端儼况

遭非鄙慮將醜折豈若狎其容而簡其事靜其
氣而遠其意使言必諍懸寶之清耳咲不傾撫
左右悅目非鄙無因而生侵侮何從而入此亦
持德之管籥爾其謹哉嫌惑疑心誠亦難分豈
唯厚貌蔽智之明深情怯剛之斷而已哉必使
猜怨愚賢則嘖咲入戾期變犬馬則步顧成妖
况動容竊斧束裝濫金又何足論是以前王作
典明慎議獄而僭濫易意朱公論壁光澤相如
而倍薄異價此言雖大可以戒小游道雖廣交

義爲長得在可久失在輕絕久由相敬絕由相
狎愛之勿勞當扶其正性忠而勿侮必藏其枉
情輔以藝業會以文辭使親不可褻疎不可間
每存大德無挾小怨率此往也足以相終酒酌
之設可樂而不可嗜嗜而非病者希病而遂青
者幾旣青旣病將殘其正若存其正性紓其妄
發其唯善成乎聲樂之會可簡而不可違違而
不背者鮮矣背而非弊者反矣旣弊旣背將受
其毀必能通其礙而節其流意可爲和中矣善

施者唯發自人心乃出天則與不待積取無謀
實益散千金誠不可能贍人之急雖乏必先使
施如王丹愛如杜林亦可與言交矣浮華怪飭
虛廣之具奇服麗食棄素之方動人勸慕傾人
顧盼可以遠識奪難用近欲從若覩其滯怪知
生之無心爲見奇麗能致諸非務則不抑自貴
不禁自止夫數相者必有之徵旣聞之術人又
驗之吾身理可得而論也人者兆氣二德稟體
五常二德有奇偶五常有勝殺及其爲人寧無

叶沴亦猶生有好醜死有天壽人皆知其懸天
至於丁年乖遇中身迂合者豈可易地哉是以
君子道命愈難識道愈堅古人恥以身爲溪壑
者屏欲之謂也欲者性之煩濁氣之蒿蒸故其
爲害則燠心智耗真情傷人和犯天性雖生必
有之而生之德猶火含煙而妨火桂懷蠹而殘
桂然則火勝則煙滅蠹壯則桂折故性明者欲
簡嗜繁者氣昏去明卽昏難以主一目其以中
外羣聖建言所黜儒道衆智發論是除然有之

者不患深故藥之者恒苦術淺所以毀道多而
義寡顧蓋誠難每指可易能易每指亦明之未
廉嗜之性不同故畏慕之情或異從事於人者
無一人我之心不以已之所善謀人爲有明矣
不以人之所務失我能有守矣已所謂然而彼
定不能奕碁之蔽悅彼之可而忘我不可學嘖
之蔽將求去蔽者念通忤介而已流言謗議有
道所不免况在闕薄難用筭防接應之方言必
出已或信不素積嫌間所襲或性不和物尤怨

所聚有一于此何處逃毀苟能反悔在我而無
責於人必有達鑒昭其情遠識迹其事日省吾
躬月料吾志寬嘿以居潔靜以期神道必在何
恤人言嘒曰富則盛貧則病矣貧之病也不唯
形色麤麤或亦神心沮廢豈但交友疎棄必有
家人訥讓非廉深遠識者何能不移其植故欲
蠲憂患莫若懷古懷古之志當自同古人見通
則憂淺意遠則怨浮昔琴歌于緇蓬之中者用
此道也夫信不逆彰義必出隱交賴相盡明有

相照一面見青則情固丘岳一言中志則意入淵泉以此事上水火可蹈以此託友金石可弊豈待覓其榮實乃將議報厚之篚篚然後圖終如或與立茂思無忽祿利者受之易易則人之所榮蠶穡者就之艱艱則物之所鄙艱易既有勤倦之情榮鄙又間向背之意此二塗所爲反也以勞定國以功施人則役徒屬而擅豐麗自埋於民自事其生則督妻子而趨耕織必使陵侮不作懸企不萌所謂賢鄙處宜華野同泰人

以有惜爲質非假嚴刑有恒爲德不慕厚貴有
惜者以理葬有恒者與物終世有位去則情盡
斯無惜矣又有務謝則心移斯不恒矣又非徒
若此而已或見人休事則懃斲結納及聞否論
則處彰離貳附會以從風隱竊以成釁朝吐面
譽暮行背毀昔同稽欵今猶叛戾斯爲甚矣又
非唯若此而已或憑人惠訓藉人成立與人餘
論依人揚聲曲存稟仰甘赴塵軌衰沒畏遠忌
聞影迹又蒙之毀之無度心短彼能私樹已拙

自崇樞輩周旋高議有人至此實蠹大倫每思
防避無通問伍視驚異之事或無涉傳遭卒迫
之變反思安順若異從已發將尸謗人迫而又
迂愈使失度能夷異如裴楷處逼如裴遐可稱
深士乎喜怒者有性所不能無常起於褊量而
止於弘識然喜過則不重怒過則不威能以恬
漠爲體寬愉爲器者大喜蕩心微抑則定甚怒
煩性小忍卽歇動無愆容舉無失度則物將自
懸人將自止習之所變亦大矣豈惟蒸性染身

乃將移智易慮故曰與善人居如入芝蘭之室久而不聞其芬與之化矣與不善人居如入鮑魚之肆久而不知其臭與之變矣是以古人慎所與處唯夫金真玉粹者乃能盡而不污爾故曰丹可滅而不能使無赤石可毀而不能使無堅苟無丹石之性必慎浸染之由能以懷道爲人必存從理之心道可懷而理可從則不議貧議所樂耳或云貧何由樂此未求道意道者瞻富貴同貧賤理固得而自我喪之未爲通議苟

議不喪夫何不樂或曰溫飽之貴所以榮生饑
寒在躬空曰從道取諸其身將非篤論此又通
理所用凡生之具豈簡定實或以膏腴天性有
以菽藿登年中散云所足與不由外是以稱體
而食貧歲愈嗛量腹而炊豐家餘食非粒實息
耗意有盈虛爾况心得復劣身獲仁富明白入
素氣志如神雖十旬九飯不能含饑業席三屬
不能爲寒豈不信然且以已爲度者無以自通
彼量渾四游而幹五緯天道弘也振河海而載

山川地道厚也一情紀而合流貫人靈茂也昔
之通乎此數者不爲剖判之行必廣其風度無
挾私殊博其交道唯懷曲異故望塵請友則義
士輕身一遇拜親則仁人投分此倫序通允禮
俗平一上獲其用下得其和世務雖移前休未
遠人之適主吾將反本三人至生慙有之識幼
壯驟過衰耗驚及其間天鬱旣難勝言假獲存
遂又云無幾柔麗之身亟委土木剛清之才遽
爲丘壤回遑顧慕雖數紀之中爾以此持榮曾

不可留以此服道亦何能平進退我生游觀所
達得貴爲人將在合理合理之貴惟神與交素
有心靈義無自惡偶信天德逝不上慙欲使人
沈來化志符往哲勿謂是賒日鑿斯密著通此
意吾將忘老如固不然其誰與歸值懷所撰畧
布衆脩若備舉情見顧未書一瞻身之經別在
田家節政奉終之紀自著燕居畢義

又

顏延之

達見同善通辯異科一曰言道二曰論心三曰
校理言道者本之於天論心者議之於人校理
者取之於物從而別之由塗參陳要而會之終
致可一若夫玄神之經窮明之說義兼三端至
無二極但語出梵方故見猜世學事起殊倫故
獲非恒情天之賦道非差胡華人之稟靈豈限
外內一以此思可無臆裁爲道者蓋流出於仙
法故以練形爲上崇佛者本在於神教故以治

心爲先練形之家必就深曠反飛靈藥丹石粒
芝精所以還年却老延華駐彩欲使體合纁霞
軌徧天海此其所長及僞者爲之則忌災祟課
粗願混士女亂妖正此其巨蠹也治心之術必
辭親偶閉身性師淨覺信緣命所以反壹無生
尅成聖業智邈大明志狹恒劫此其所貴及詭
者爲之則藉髮落狎菁華傍榮聲謀利論此其
甚誣物有不然事無不弊衡石日陳猶患差忒
沉神道不形固衆端之所假未能體神而不疑

神無者以爲靈性密微可以積理知洪變歛恍
可以大順待照若鏡天肅若窺淵能以理順爲
人者可與言有神矣若乃罔其真而青其弊是
未加心照耳

頌

碧芙蓉頌

澤芝芳豔檀奇水屬練氣紅荷比符縹玉擢麗
滄池飛映雲屋寶紀仙方名書靈躅

赤檣頌

日御比至夏德南宣玉蒸榮心氣動上玄華縹
間物受色朱天是謂珍樹含艷卅間

贊

蜀葵贊

井維降精，嶠絡升靈。物微氣麗，卉草之英。渝豔衆葩，冠冕群英。類麻能直，方葵不傾。

新喻侯茅齋贊

輦草作壯采茅昭儉哲人素節貴而能貶羈結
茨危瞰臨涯濼

箴

大筮箴

余因讀易偶意著龜友人有請決遊宦務志卦
有咎占故作大筮箴以悟焉

先王設筮大人盡慮卦遭同人變而之豫先號
後笑初睽未遇時至運來當在三五功畢官成
幾乎衍數慶在坤宮災在坎路不出戶庭獨立
無懼違此而動投足失步無情爾儀靈骨有知
無日余進神筴不豫南人司箴敢告馳騫

連珠

範連珠

蓋聞匹夫履順則天地不違一物投誠則神明
可交事有微而愈著理有闇而必昭是以魚腸
傾首離光爲之反舍有鳥拂波河伯爲之不潮

顏光祿集卷之五

宋琅邪顏延之延年著

明閩瀋張燮紹和纂

謚議

宋武帝謚議

以爲聖哲同風功美殊稱蓋出乎道者無方故
刑于物者不一伏惟道塞人神信通期運愛敬
所稟因心則遠英粹之照正性自天體苞潛躍
慮周卷舒龍德在陰雖艱貞而不悶因時而惕

故有來其必亨在晉之季皇塗荐阻櫬櫓干紀
璇璣失馭天鑒靈武民屬聖明不假十室之資
不藉百乘之賦首義馳風一鼓靜亂滌除泰階
消殞薄蝕斯亮登庸之基經綸之始者也內難
雖弭外圖未輯河華海岱負固相望荆濮燕毫
候服交侵眷言帝畿思康王路戎不再駕遺氓
卽序斥堠之所未羈亭徼之所不譯莫不飾誠
請罪款塞來賓故能洒掃中嶽致廟九山神道
會昌寶命旣集損之而益後身愈先旣而儀形

帝載揖讓天歷改玉乎文祖班瑞于神宗貫華
寢機文武摺笏故宸居兩楹坐一八表國訓成
均之學家沾撫辜之仁大美配天必終之以儉
德道固萬葉猶申之以話言允所謂教思無窮
樹之長世取高上代顧邈前王矣

哀策文

宋文帝元后哀策文

惟元嘉十七年七月二十六日大行皇后崩于
顯陽殿粵九月二十七日將遷瘞于長寧陵禮
也龍輶纏紼容翟結轡皇塗昭列神路幽嚴皇
帝親臨祖饋躬瞻宵戴節遺儀於組旒淪徂音
乎珩珮悲黼黻之移御痛輦輿之重晦降輿客
位撤奠殯階乃命史臣累德述懷其辭曰
倫昭儷昇有物有憑圓精初爍方祗始凝昭哉

世族祥發慶膺祕儀景胃圖光玉繩昌暉在陰
柔明將進率禮蹈和稱詩納順爰自待年金聲
夙振亦既有行素章增絢象服是加言觀維則
俾我皇風始基嬪德惠問川流芳猷淵塞方江
派漢載謠南國伊昔不造鴻化中微用集寶命
仰陟天機釋位公宮登聯紫闥欽若皇姑允廸
前徽孝達寧親敬行宗祀進思才淑傍綜圖史
發音在詠動容成紀壺政穆宣房樂韶理坤則
順成星軒潤飾德之所屆惟深必測下節震騰

上清腴側有來斯雍無思不極謂道輔仁司化
莫晰象物方臻眡禋告沴太和旣融收華委世
蘭殿長陰椒塗弛衛嗚呼哀哉戒涼在律杪秋
卽爰霜夜流唱曉月升魄八神警引五輅遷跡
嗷嗷儲嗣哀哀列辟灑零玉墀雨洒丹掖撫存
悼亡感今懷昔嗚呼哀哉南背國門北首山園
僕人按節服馬顧轅遙酸紫蓋眊泣素軒滅綵
清都夷體壽原邑野淪霽戎夏悲謹來芳可述
往駕弗援嗚呼哀哉

誄

陶徵士誄

夫璿玉致美不爲池隍之寶桂椒信芳而非園
林之實豈其樂深而好遠哉蓋云殊性而已故
無是而至者物之藉也隨踵而立者人之薄也
若乃巢由之抗行夷皓之峻節故已父老堯禹
錙銖周漢而綿世寢遠光靈不屬至使菁華隱
沒芳流歇絕不亦惜乎雖今之作者人自爲量
而首路同塵輟塗殊軌者多矣豈所以昭末景

泛餘波乎有晉徵士潯陽陶淵明南嶽之幽居
者也弱不好弄長實素心學非稱師文取指達
在衆不失其寡處言每見其嘿少而貧苦居無
僕妾井曰弗任藜藿不給母老子幼就養勤置
遠惟因生致親之議追悟毛子捧檄之懷初辭
州府三命後爲彭澤令道不偶物棄官從好遂
乃解體世紛結志區外定迹深棲於是乎遠灌
畦鬻蔬爲供魚菽之祭織絢緯蕭以克糧粒之
費心好異書性樂酒德簡棄煩促就成省曠殆

所謂國爵解貴家人志貧者歟有詔徵著作郎
稱疾不赴春秋六十有三元嘉四年月日卒於
潯陽縣之柴桑里近識悲悼遠士傷情冥默福
應嗚呼淑貞夫實以誅華名由謚高苟允德義
貴賤何筭焉若其寬樂令終之美好廉克已之
操有合謚典無愆前志故詢諸友好宜謚曰靖
節徵士其詞曰

物尚孤生人固介立豈伊時邁曷云世及嗟乎
若士望古遙集韜此洪族蔑彼名級睦親之行

至自非敦然諾之信重於布言廉深簡潔貞夷
粹溫和而能峻博而不繁依世尚同詭時則異
有一於此而兩默置豈若夫子因心違事畏榮
好古薄身厚志世霸虐禮州壤推風孝惟義養
道必懷邦人之秉彝不隘不恭爵同下士祿等
上農度量難鈞進退可限長卿棄官稚賓自免
子之悟之何悟之辯賦辭歸來高蹈獨善亦旣
超曠無適非心汲流舊巖葺宇家林晨煙暮靄
春煦秋陰陳書綴卷置酒絃琴居備勤儉躬兼

貧病入吾其憂予然其命隱約就閑遷延辭聘
非直也明是惟道性糾纏幹流冥漠報施孰云
與仁實疑明智謂天蓋高胡謬斯義履信曷憑
思順何寧年在中身疾維疴疾視化如歸臨凶
若吉藥劑弗嘗禱祠非恤僚幽告終懷和長畢
嗚呼哀哉敬述清節式遵遺占存不願豐沒無
求瞻省計却賻輕哀薄歛遭壞以穿旋葬而窆
嗚呼哀哉深心追往遠情逐化自爾介居及我
多暇伊好之洽接閭隣舍宵盤晝憩非舟非駕

念昔宴私舉觴相誨獨正者危至方則礙哲人
卷舒布在前載取鑑不遠吾規子佩爾寔愀然
申言而發遺衆速尤迕風先蹶身才非寶榮聲
有歇徽音永矣誰箴余闕嗚呼哀哉仁焉而終
智焉而斃黔婁旣沒展禽亦逝其在先生同塵
往世旌此靖節加彼康惠嗚呼哀哉

陽給事諫

惟永初三年十一月十一日宋故寧遠司馬濮陽太守彭城陽君卒嗚呼哀哉瓚少稟志節資性忠泉奉上以誠率下有方朝嘉其能故授以邊導永初之末佐守滑臺值國禍薦臻王畧中谷獯虜間爨剝司充幽并騎弩屯逼鞏洛列營緣戍相望屠潰瓚奮其猛銳志不違難立乎將卒之間以緝華裔之衆罷困相保堅守四旬上下力屈受陷勅寇士師奔擾棄軍爭免而瓚

誓命沈城佻身飛鏃兵盡器竭斃于旗下非夫
貞壯之氣勇烈之志豈能臨敵引義以死徇節
者哉景平之元朝廷聞而傷之有詔曰故寧遠
司馬濮陽太守陽瓚滑臺之逼厲誠固守投命
徇節在危無撓古之烈士無以加之可贈給事
中振卹遺孤以慰存亡追寵旣彰人知慕節河
汴之間有義風矣逮元嘉廓祚聖神紀物光昭
茂緒旌錄舊勲苟有槩於貞孝者實事感於仁
明末臣蒙固側聞至訓敢詢諸前典而爲之誄

其辭曰

貞不常祐義有必甄處父勤君怨在登賢苦夷
致果趙子行間忠壯之烈宜自爾先舊勲雖廢
邑氏遂傳惟邑及氏自溫徂陽狐續旣降晉族
弗昌之子之生立績宋皇拳猛沈毅溫敏肅良
如彼竹柏負雪懷霜如彼駢駟配服驂衡邊兵
喪律王畧未恢函陝堙阻瀍洛蒿萊朔馬東騫
胡風南埃路無歸鞚野有委骸帝圖斯艱簡兵
授才寔命陽子佐師危臺憬彼危臺在滑之阿

周衛是交鄭翟是爭昔惟華國今實邊亭憑巘
結關負河縈城金拆夜擊和門晝扃料敵厭難
時惟陽生涼冬氣勁塞外草衰遶矣獯虜乘障
犯威鳴驪橫厲霜鏑高聳軼我河縣停我洛畿
攢鋒成林投鞍爲圍翳翳窮壘嗷嗷羣悲師老
變形地孤援闕卒無半救馬實掛秣守未焚衝
攻已濡褐烈烈陽子在困彌達勉慰痍傷拊巡
饑渴力雖可窮氣不可奪義立邊疆身終鋒枯
嗚呼哀哉責父隕節魯人是志汧督效貞晉策

攸記皇上嘉悼思存寵異予以贈之言登給事
疏爵紀庸恤孤表嗣嗟爾義士沒有餘喜嗚呼
哀哉

祭文

爲湘州祭虞舜文

惟哲化神繼天作聖藏器漁陶致身愛敬是以
二妃嬪德九子觀命在麓不迷御衡以正唐歷
旣終虞道乃光谷堯授禹素俎采堂百齡厭世
萬里陟方敬詢故老欽咨聖君職奉西湘虔屬
荆雲神之聽之匪酒伊葷

爲湘州祭屈原文

維有宋五年月日湘州刺史吳郡張邵恭承帝
命建旛舊楚訪懷沙之淵得捐珮之浦弭節羅
潭艤舟汨渚乃遣戶曹掾某敬祭故楚三閭大
夫屈君之靈蘭薰而摧玉纁則折物忌堅方人
諱明潔曰若先生逢辰之缺溫風迨時飛霜急
節靡苒遘紛昭懷不端謀折儀尙貞蔑椒蘭身
絕郢闕迹徧湘干比物荃蓀連類龍鸞聲溢金
石志華日月如彼樹芳實頽實發望汨心歎瞻

羅思越藉用可塵昭忠難闕

祭弟文

園棺窮野格殯中荒雲影風滅筵寢虛張人往
運來自秋徂陽蕃蘭落色宿草滋長孰云不痛
辭家去鄉爾之于役爰適茲邑上秋告來方春
佇立如何不弔吉違凶集六親痛心姻朋浩泣
我雖載奔伊何云及永懷在昔追亡悼存惟兄
及弟瞻母望昆生無榮嫵沒望歸魂令龜吉兆
祖襯東旋靈轅次路嚴舟在川廓然何及痛矣
終天

銘

家傳銘

曠彼琅邪實唯海宇誰其來遷時聞遠祖青州
隱秀爰始樊居內辭鼎府外秉邦閭建節中平
分竹黃初刑清齊右政偃營區葛嶧明懿平陽
聰理或薦公庭或登宰士列美霸朝變風千里
華萼之茂於昭不已

狀

天馬狀

降靈驥子九方是選白驪朱文綠鬃紫燕水軟
驚鳧陸越飛箭過山爲風值雲成電

附錄

顏延之傳

沈約

顏延之字延年琅邪臨沂人也曾祖含右光祿大夫祖約零陵太守父顯護軍司馬延之少孤貧居負郭室巷甚陋好讀書無所不覽文章之美冠絕當時飲酒不護細行年三十猶未婚妹適東莞劉憲之穆之子也穆之旣與延之通家又聞其美將仕之先欲相見延之不往也後將軍吳國內史劉柳以爲行參軍因轉主簿豫章

公世子中軍行參軍義熙十二年高祖北伐有
宋公之授府遣一使慶殊命參起居延之與同
府王參軍俱奉使至洛陽道中作詩二首文辭
藻麗爲謝晦傅亮所賞宋國建奉常鄭鮮之舉
爲博士仍遷世子舍人高祖受命補太子舍人
鴈門人周續之隱居廬山儒學著稱永初中徵
詣京師開館以居之高祖親幸朝彥畢至延之
官列猶卑引升上席上使問續之三義續之雅
使辭辯延之每析以簡要旣連挫續之上又使

還自敷釋言約理暢莫不稱善徙尙書儀曹郎
太子中舍人時尙書令傅亮自以文義之美一
時莫及延之負其才辭不爲之下亮甚疾焉廬
陵王義真頗好辭義待接甚厚徐羨之等疑延
之爲同異意甚不悅少帝卽位以爲正員郎兼
中書尋徙員外常侍出爲始安太守領軍將軍
謝晦謂延之曰昔荀勗忌阮咸斥爲始平郡今
卿又爲始安可謂二始黃門郎殷景仁亦謂之
曰所謂俗惡俊異世疵文雅延之之郡道經汨

潭爲湘州刺史張紀祭屈原文以致其意元嘉
三年羨之等誅徵爲中書侍郎尋轉太子中庶
子頃之領步兵校尉賞遇甚厚延之好酒疎誕
不能斟酌當世見劉湛殷景仁專當要任意有
不平常云天下之務當與天下共之豈一人之
智所能獨了辭甚激揚每犯權要謂湛曰吾名
器不升當由作卿家吏湛深恨焉言於彭城王
義康出爲永嘉太守延之甚怨憤乃作五君詠
以述竹林七賢山濤王戎以貴顯被黜詠嵇康

曰詩有時鍛龍性誰能馴詠阮籍曰物故可
不論塗窮能無慟詠阮咸曰屢薦不入官一麾
乃出守詠劉伶曰韜精日沉飲誰知非荒宴此
四句蓋自序也湛及義康以其辭旨不遜大怒
時延之已拜欲黜爲遠郡太祖與義康詔曰降
延之爲小邦不政有謂其在都邑豈動物情罪
過彰著亦士庶共悉直欲選代今思愆里閭猶
復不悛當驅往東土乃志難恕自可隨事錄治
殷劉意咸無異也乃以光祿勳車仲遠代之延

之與仲遠世素不協屏居里巷不豫人間者七載中書令王球名公子遺務事外廷之慕焉球亦愛其材情好甚款廷之居常罄匱球輒贍之晉恭思皇后葬應須百官湛之取義熙元年除身以廷之兼持邑吏送札廷之醉投札于地曰顏廷之未能事生焉能事死閑居無事爲庭誥之文劉湛誅起廷之爲始興王濬後軍諮議參軍御史中丞在任縱容無所舉奏遷國子祭酒司徒左長史坐啓買人田不肯還直尙書左丞

荀赤松葵之曰求問舍前賢所鄙延之唯利
是視輕買陳聞依傍詔恩拒捍餘直垂及周年
猶不畢了昧利苟得無所顧忌延之昔坐事屏
斥復蒙徇進而曾不悛革怨誹無已交游鬪其
沈迷麴蘖橫興譏謗詆毀朝士仰竊過榮增憤
薄之性私恃顧盼成疆梁之心外示寡求內懷
奔競干祿祈遷不知極已預譏班觴肆罵上席
山海含容每存遵養愛兼雕蟲未忍遐棄而驕
放不節日月彌著臣聞聲問過情孟軻所耻况

聲非外來問由已出雖心智薄劣而高自比擬
客氣虛張曾無愧畏豈可復弼亮五教增曜台
階請以延之訟田不實妄干天聽以彊凌弱免
所居官訟持復爲祕書監光祿勳太常時沙門
釋慧琳以才學爲太祖所賞愛每召見常升獨
榻延之甚疾焉因醉白上曰昔同子參乘袁絲
正色此三台之坐豈可使刑餘居之上變色延
之性旣褊激兼有酒過肆意直言曾無遏隱故
論者多不與云公身清約不營財利布衣蔬食

獨附郊野當其爲適傍若無人二十九年上表
自陳不許明年致事元凶弑立以爲光祿大夫
先是子竣爲世祖南中郎諮議參軍及義師入
討竣參定密謀兼造書檄劭召延之示以檄文
問曰此筆誰所造延之曰竣之筆也又問何以
知之延之曰竣筆體臣不容不識劭又曰言辭
何至乃爾延之曰竣尙不顧老父何能爲陛下
劭意乃釋由是得免世祖登祚以爲金紫光祿
大夫領湘東王師子竣旣貴重權傾一朝凡所

資供延之一無所受器服不改宅宇如舊常乘
羸牛笨車逢竣鹵簿卽屏往道側又好騎馬遨
遊里巷遇知舊輒據鞍索酒得酒必醺然自得
常語竣曰平生不喜見要人今不幸見汝竣起
宅謂曰善爲之無令後人笑汝拙也表解師職
加給親信三十人孝建三年卒時年七十三追
贈散騎常侍特進金紫光祿大夫如故謚曰憲
子延之與陳郡謝靈運俱以詞彩齊名自潘岳
陸機之後文士莫及也江左稱顏謝焉所著並

傳於世竣別有傳竣弟惻亦以文章見知官至
江夏王傳義恭大司徒錄事參軍蚤卒太宗卽
位詔曰延之昔師訓朕躬情契兼款前記室參
軍濟陽太守樊伏勤蕃朝綢繆恩舊可擢爲中
書侍郎樊延之第三子也

顏延之傳

李延壽

顏延之字延年琅邪臨沂人也曾祖舍晉左光祿大夫祖約零陵太守父隴護軍司馬延之少孤貧居負郭好讀書無所不覽文章冠絕當時好飲酒不護細行年三十猶未婚妹適東莞劉穆之子憲之穆之聞其美才將仕之先欲相見延之不往也後爲宋武帝豫章公世子中軍行參軍及武帝北伐有宋公之授府遣延之慶殊命行至洛陽周視故宮室盡爲禾黍悽然詠黍

離篇道中作詩二首爲謝晦傳亮所賞武帝受命補太子舍人鴈門周續之隱廬山儒學著稱永初中徵詣都下開館以居之武帝親幸朝彥畢至延之宮官列卑引升上席上使問續之上義續之雅使詞辯延之每以簡要連挫續之上又使還自敷釋言約理暢莫不稱善再遷太子中舍人時尙書令傅亮自以文義一時莫及延之負其才不爲之下亮甚疾焉廬陵王義真待之甚厚徐羨之等疑延之爲同異意甚不悅少

帝卽位累遷始安太守領軍將軍謝晦謂延之曰昔荀勗忌阮咸斥爲始平郡今卿又爲始安可謂二始黃門郎殷景仁亦謂之曰所謂人惡俊異世疵文雅延之之郡道經汨潭爲湘州刺史張邵祭屈原文以致其意元嘉三年羨之等誅徵爲中書侍郎轉太子中庶子領步兵校尉賞遇甚厚延之旣以才學見遇當時多相推服唯袁淑年倍小延之不相推重延之忿於衆中折之曰昔陳元方與孔元駿齊年文學元駿拜

元方於牀下今君何得不見拜淑無以對延之
疎誕不能取容當世見劉湛殷景仁專當要任
意有不平常言天下事豈一人之智所能獨了
辭意激揚每犯權要又少經爲湛父柳後將軍
主簿至是謂湛曰吾名器不升當由作卿家吏
耳湛恨焉言於彭城王義康出爲永嘉太守延
之甚怨憤乃作五君詠以述竹林七賢山濤王
戎以貴顯被黜詠嵇康云鸞翮有時鍛龍性誰
能調詠阮籍云物故不可論途窮能無慟詠阮

咸云屢薦不入官一麾乃出守詠劉伶云藉精
日沈飲誰知非荒宴此四句蓋自序也湛及義
康以其辭旨不遜大怒欲黜爲遠郡文帝與義
康詔曰宜令思愆閭里猶復不悛當驅往東土
乃至難恕者自可隨事錄之於是延之屏居不
豫人間者七載中書令王球以名公子遺務事
外與延之雅相愛好每振其罄匱晉恭思皇后
葬應須百官皆取義熙元年除身以延之兼持
邑吏送札延之醉投札於地曰顏延之未能事

生焉能事死文帝常召延之傳詔頗不見常目
但酒店裸袒挽歌了不應對他日醉醒乃見帝
常問以諸子才能延之曰竣得臣筆測得臣文
爽得臣義躍得臣酒何尙之嘲曰誰得卿狂荅
曰其狂不可及尙之爲侍中在直延之以醉請
焉尙之望見便陽眠延之發簾熟視曰朽木難
彫尙之謂左右曰此人醉甚可畏閑居無事爲
庭誥之文以訓子弟劉湛誅後起延之爲始興
王濬後軍諮議參軍御史中丞在任從容無所

舉奏遷國子祭酒司徒左長史何尙之素與延之狎書與王球曰延之有後命教府無復光輝坐啓買人田不肯還直尙書左丞荀赤松奏之以求田問舍前賢所鄙延之唯利是視輕冒陳聞依傍詔恩抵捍餘直垂及周年猶不畢了昧利苟得無所顧忌延之昔坐事屏斥復蒙抽進而曾不悛革怨誹無已交游闕茸沈迷麴蘖橫興譏謗詆毀朝士仰竊過榮增憤薄之性私恃顧盼成強梁之心外示寡求內懷奔競干祿祈

遷不知極已預宴班觴肆詈上席山海容舍每
存遵養愛兼雕虫未忍遐棄而驕放不節日月
彌甚臣聞聲問過情孟軻所恥况聲非外來問
由已出雖心智薄劣而高自比擬客氣虛張曾
無愧畏豈可復弼亮五教增耀台階請以延之
訟田不實妄干天聽以強凌弱免所居官詔可
後爲祕書監光祿勳太常時沙門釋慧琳以才
學爲文帝所賞朝廷政事多與之謀遂士庶歸
仰上每引見常升獨闕延之甚疾焉因醉白上

曰昔同子參乘袁絲正色此三台之坐豈可使
刑餘右之上變色延之性既褊激兼有酒過肆
意直言曾無回隱故論者多不與之謂之顏彪
居身儉約不營財利布衣蔬食獨酌郊野當其
爲適傍若無人三十年致事元凶弑立以爲光
祿大夫長子竣爲秀武南中郎諮議參軍及義
師入討竣定密謀兼造書檄劄召延之示以檄
文問曰此筆誰造延之曰竣之筆也又問何以
知之曰竣筆體臣不容不識劄又曰言辭何至

乃爾延之曰竣尙不顧老臣何能爲陛下劬意
乃釋由是得免孝武登祚以爲金紫光祿大夫
領湘東王師嘗與何偃同從上南郊偃於路中
遙呼延之曰顏公延之以其輕脫怪之荅曰身
非三公之公又非田舍之公又非君家阿公何
以見呼爲公偃羞而退竣旣貴重權傾一朝凡
所資供延之一無所受器服不改宅宇如舊常
乘羸牛車逢竣鹵簿卽屏住道側又好騎馬邀
游里巷遇知舊輒據鞍索酒得必傾盡欣然自

得嘗語竣曰平生不喜見要人今不幸見汝見竣起宅謂曰善爲之無令後人笑汝拙也表解師職加給親信二十人嘗早候竣遇賓客盈門竣方臥不起延之怒曰恭敬樽節福之基也驕恨傲慢禍之始也况出糞土之中而升雲霞之上傲不可長其能久乎延之有愛姬非姬食不飽寢不安姬憑寵常盪延之墜牀致損竣殺之延之痛惜甚至嘗坐靈上哭曰貴人殺汝非我殺汝以冬日臨哭忽見妾排屏風以壓延之延

之懼墜地因病卒建三年卒年七十三贈特進
諡曰憲子延之與陳郡謝靈運俱以辭采齊名
而遲速懸絕文帝嘗各敕擬樂府北上篇延之
受詔便成靈運久之乃就延之嘗問鮑照已與
靈運優劣照曰謝五言如初發芙蓉自然可愛
君詩若鋪錦列繡亦雕績滿眼延之每薄湯惠
休詩謂人曰惠休制作委巷中歌謠耳方當誤
後事是時議者以延之靈運自潘岳陸機之後
文士莫及江右稱潘陸江左稱顏謝焉

與顏延之書

何尚之

江左中丞雖亦一時髦俊然膏粱名士
猶不樂延之爲御史中丞尚之與書

絳騶清路白簡深劾取之仲容或有虧耶

祭顏光祿文

王僧達

維宋孝建三年九月癸丑朔十九日辛未王君
以山羞野酌敬祭顏君之靈嗚呼哀哉夫德以
道樹禮以仁濟惟君之懿早歲飛聲義窮幾象
文蔽班揚性婁剛絜志度淵英登朝光國實宋
之華才通漢魏譽浹龜沙服爵帝典棲志雲阿
清交素友比景共波氣高叔夜嚴方仲舉逸翮
獨翔孤風絕侶流連酒德嘯歌琴緒游顧移年
契闊宴處春風首時爰談爰賦秋露未凝歸神

太素明發晨駕瞻廬望路心悵目泫情條雲互
涼陰掩軒娥月寢耀微燐動光几牘誰炤衾柩
長塵絲竹罷調孽悲蘭宇屑涕松嶠古來共盡
牛山有淚非獨昊天殲我明懿以此恐哀敬陳
奠饋申酌長懷顧望獻歆嗚呼哀哉

遺事

何尚之與顏延之少相好狎二人並短小尚之
常謂延之爲猿延之目尚之爲猴同遊西池延
之問路人云吾二人誰似猴路人指尚之爲似
延之喜笑路人曰彼似猴耳君乃真猴有人求
爲吏部郎尚之曰官當圖人人安得圖官延之
笑曰我聞古官人以求今官人以勢勢之所求
于何疑焉論議徃反並傳於世

南史何
尚之傳

顏延之在潯陽與陶潛情款後爲始安郡經過

潛每往必酬飲刺史王弘欲要延之一坐彌日
不得延之臨去留二萬錢與潛潛悉送酒家

南史

陶潛
傳

孝武嘗問顏延之曰謝希逸月賦何如荅曰美
則美矣但莊始知隔千里今共明月帝召莊以
延之荅語語之莊應聲曰延之作秋胡詩始知
生爲久離別沒爲長不歸帝撫掌竟日

石誌不出禮起宋元嘉中顏延之爲王球石誌
無銘策故以紀行自爾以來共相祖習

南史

桂林獨秀山孤枝秀異下有洞穴凝垂竇乳宋

顏延年牧此郡嘗于石室中讀書遺跡猶存曾

賦詩云未若獨秀者嵯峨郭邑間是也

桂林風土記

顏延之著離識論帝命嚴法師辨其同異往還

終日笑曰公等今日無愧支許之談也

廣弘明集

南唐潘佑母方娠夢古衣冠人告曰我顏延之

也與夫人爲子及生七歲始能語曰兒腴傷白

龍爲上帝所罰

馬令南唐書

張新安少與顏光祿鄰居顏談議飲酒喧呼不

絕新安靜駭無聲後顏於離邊聞其與客語設
胡牀坐聽辭義清玄顏謂賓曰此中有人由此
不復酣叫

集評

顏延之折達性汪汪尤爲名理足開獎人意

宋文

延年體裁明密

宋書謝靈運傳論

顏延之詩其源出於陸機尙巧似體裁綺密情喻淵深動無虛發一句一字皆致意焉又喜用古事彌見拘束雖乖秀逸是經綸文雅才雅才減若人則蹈於困躓矣

詩品

齊太祖報武陵王曰康樂放蕩作體不辨有首

尾安仁士衡深可宗尚顏延之抑其次也

南齊書

子謂顏延之王儉任昉有君子之心焉其文約

以則

文中子

顏延年之作如般般之獸白質黑章收收穆穆君子之態